

براءة اختراع



خلصت خلاص المسرحية

وانا زى أي حد عادي

كومبارس مَثَل تمثيلية

وفي النهاية بدوره راضي

راضي بقليلي

هتقول يمين ؟ !

سمعا وطاعة

هتقول شمال ؟!

هاقول طريقي

عمري ماكنت ناكر للجميل

قالوا عني واد جدع

حمل أسية

شكل أبوه عيل أصيل

بس عمر ماكان في إيدو الاختيار

كنت ماشي مطاطي راسي

كنت باحلم بالنهار

حتى حلمي كنت راكنه

في الانتظار

خطوتي جنب الرصيف

كنت فرحان بالقليل

حتى لو فتافيت رغيف

عمر يوم ما كان في صوتي الارتفاع

حتى لما قتلوا حلمي

كنت صابر

وصنعت من صبري

براءة اختراع

وانا مش لوحدني

في الدنيا ياما طيبين

متسلسلين

ومقطوعين اللسان

برضه زيي

يعنى عادي

كلنا ماسكين دفوف

متزوقين

ومركونين

على الرفوف

اخرجي ياللا مني

واكسري فيا السكوت

قتلوا فينا

أجمل ما فينا

صنعوا لنا

أكبر تابوت

حولوا الحلم لكابوس ،

كنا فاكريتهم أئمة

طلعوا ألعن م المجوس

أخرجي يا احلامي مني

خَرَجِي مني الكلام

مش هاعيش

ومطاطي راسي

مش هاكون زي النعام

علميني الإعتراض

واققلي فيا الجبان

واصنعي لحلمي جناح

فالنهار يظهر يبان

.....